

ZHONGGUOSHIDA

中國十大 文豪全集

WENHAOQUANJI

李白



时代文艺出版社

李白全集

[清] 王琦 注

韩鹏杰 点校

(五)



天门山铭

《江南通志》：博望山，在太平府西南三十里。梁山，在和州南六十里。两山石状巉岩，东西相向，横夹大江，对峙如门。俗呼梁山曰西梁山，呼博望山曰东梁山，总谓之天门山。春秋时楚获吴舡于此，实大江要害之地，自六代建都金陵，皆于此屯兵扞御，两岸山顶各有一城，宋将王元谟所筑。

梁山博望，关扃楚滨，夹据洪流，实为吴津。两坐错落，如鲸张鳞。惟海有若，^①唯川有神。牛渚怪物，目围车轮。^②光射岛屿，气凌星辰。卷沙扬涛，溯马杀人。国泰呈瑞，时讹返珍。开则九江纳锡，^③闭则五岳飞尘。^④天险之地，无德匪亲。

①《初学记》：海神曰海若。

②牛渚矶，在太平州当涂县西北三十里大江之滨，与天门山相去不及百里。《晋书》：牛渚矶水深不可测，世云其下多怪物，温峤燬犀角而照之，须臾，看水族覆火，奇形异状，或乘车马著赤衣者。其夜梦神谓曰：“与君幽明道别，何意相照也？”

③《禹贡》：九江纳锡大龟。孔颖达《正义》：龟不常用，故锡命乃纳之。蔡氏《集传》：大龟尺有二寸，所谓国之守龟，非可常得，故不为常贡。若偶得之，则使之纳锡于上。谓之纳锡者，下与上之词，重其事也。

④陆机《汉高帝功臣颂》：“波振四海，尘飞五岳。”波振、尘飞，以喻乱也。

溧阳瀨水贞义女碑铭 并序

《六朝事迹》：《大唐贞义女碑》，李白文，在溧阳县潁阳江北。周必大《泛舟游山录》：去溧阳县四十里有贞义女庙，女姓史，黄山人。李太白作记，题云：《瀨水上古贞义女碑铭并序》，前翰林院内供奉学士陇西李白述。《景定建康志》：溧水，一名瀨水，在溧阳县西北四十里，东流为潁阳江，江上有渚，曰瀨渚，伍子胥乞食投金处，故又曰投金瀨。《吴越春秋》：子胥奔吴，疾于中道，乞食溧阳，适会女子击绵于瀨水之上，笥中有饭，子胥谓曰：“夫人，可得一餐乎？”女子曰：“妾独与母居，三十未嫁，饭不可得。”子胥曰：“夫人赧穷途少饭，亦何嫌哉？”女子知非恒人，遂许之。发其箬笥，饭其盎浆，长跪而与之。子胥再餐而止。女子曰：“君有远逝之行，何不饱而餐之？”子胥已餐而去，谓女子曰：“掩夫人之壶浆，无令其露。”女子叹曰：“嗟乎！妾独与母居三十年，自守贞明，不愿从适，何宜馈饭而与丈夫，越亏礼仪，妾不忍也。子行矣。”子胥行，反顾女子，已自投于瀨水矣。呜乎！贞明执操，其丈夫女哉！

皇唐叶有六圣，再造八极，^①镜照万方，^②幽明咸熙，^③天秩有礼。^④自太古及今，君君臣臣，烈士贞女，采其名节尤彰，可激清颓俗者，皆扫地而祠之。^⑤兰蒸椒浆，^⑥岁祀罔缺。而兹邑贞义女，光灵翳然，埋冥古远，琬琰不刻，^⑦岂前修博达者为邦之意乎？^⑧



- ①六圣，高祖、太宗、高宗、中宗、睿宗、玄宗也。再造八极，谓玄宗平韦氏之难而天下复定也。
- ②《楚辞·九思》：“三光朗兮镜万方。”
- ③《书·尧典》：“庶绩咸熙。”孔安国《传》：“咸，皆也，熙，广也。”
- ④《皋陶谟》：“天秩有礼，自我五礼，有庸哉。”《正义》云：“天次序爵命，使有礼法，谓使贱事贵、卑承尊，是天道使之然也。人君当顺天意，用我公、侯、伯、子、男五等之礼，以故人君为政，当奉用我公、侯、伯、子、男五等之礼接之，使五者皆有常哉。”
- ⑤《唐会要》：天宝七载五月十五日诏：上古之君，存诸氏号，虽事先书契，而道著皇王，缅怀厥功，宁王咸秩。其三皇以前帝王，宜于京城内共置一庙，仍与三皇五帝庙相近，以时致祭。天皇氏、地皇氏、人皇氏、有巢氏、燧人氏，其祭料及乐，请准三皇五帝庙，以春秋二时享祭。历代帝王肇迹之处，未有祠宇者，所由郡置一庙享祭，仍取当时将相德业可称者二人配享。令郡县长官春秋二时择日，粢盛、蔬饌、时果、酒脯，洁诚置祭。其忠臣、义士、孝妇、烈女，史籍所载德行弥高者，所在宜置祠宇，量事致祭。殷相传说等忠臣十六人，吴太伯等义士八人，周太王妃太姜等孝妇七人，周宣王齐姜等烈女十四人，并令郡县长官春秋二时择日准前致祭。《礼记》：“至敬不坛，扫地而祭。”
- ⑥《楚辞》：“蕙肴蒸兮兰藉，奠桂酒兮椒浆。”王逸注：“蕙肴，以蕙草蒸肉也。椒浆，以椒置浆中也。”
- ⑦司马相如《上林赋》：“晷采琬琰。”颜师古曰：“琬琰，美玉也。”琬琰不刻，谓未刊立碑石。
- ⑧《楚辞》：“蹇吾法夫前修兮。”吕向注：“前修，谓前代修习道德之人。”《后汉书·刘恺传》：“景化前修，有伯夷之节。”章怀太子注：“前修，前贤也。”《汉书》：“陈汤少好书，博达善属文。”

贞义女者，溧阳黄山里史氏之女也，以家溧阳，史阙书之。岁三十，弗移天于人，^①清英洁白，事母纯

孝。手柔荑而不龟，^②身击漂以自业。

①移天，谓嫁也。见六卷《去妇词》注。

②《诗·国风》：“手如柔荑。”《毛传》曰：“如荑之新生也。”《庄子》：“宋人有善为不龟手之药者，世以泝澼纆为事。”陆德明《音释》：“龟手，司马云：文拆如龟文也。”又云：“如龟挛缩也。”李云：“泝澼纆者，击漂于水上。”

当楚平王时，平王虐忠助谗，苛虐厥政。芟于尚，
斩于奢，^①血流于朝，赤族伍氏。^②怨毒于人，何其深哉！

①《史记》：伍子胥者，楚人也，名员。员父曰伍奢，兄曰伍尚。楚平王有太子名曰建，使伍奢为太傅，费无忌为少傅。无忌不忠于太子，日夜言太子短于王曰：“自太子居城父，将兵，外交诸侯，且欲入为乱。”平王乃召伍奢考问之，伍奢知无忌谗太子，因曰：“王奈何以谗贼小臣疏骨肉之亲乎？”无忌曰：“王今不制，其事成矣。王且见禽。”于是平王怒，囚伍奢。无忌曰：“伍奢有二子，皆贤，不诛，且为楚忧。可以其父质而召之。”王使人召二子，曰：“来，吾生汝父。不来，今杀奢也。”伍尚欲往，员曰：“楚之召我兄弟，非欲以生我父也，恐有脱者，后生患，故以父为质，诈召二子。二子去则父子俱死，不如奔他国，借力以雪父之耻。俱灭无为也。”伍尚曰：“我知往终不能全父命，然恨父召我以求生而不往，后不能雪耻，终为天下笑耳。”谓员：“可去，汝能报杀父之仇，我将归死。”尚既就执，使者捕伍胥，伍胥贯弓执矢向使者，使者不敢进，伍员遂亡。伍尚至楚，楚并杀奢与尚也。

②扬雄《解嘲》：“不知一跌将赤吾之族也。”颜师古注：“见诛杀者必流血，故云赤族。”李善注：“赤，谓诛灭也。”《海录碎事》：古人谓空尽无物曰赤，如赤地千里，《南史》称其家赤贫是也。



赤族，言尽杀无类也。《汉书注》以为流血丹其族，大谬。

子胥始东奔勾吴，^①月涉星遁。或七日不火，^②伤弓于飞。逼迫于昭关，^③匍匐于濠渚。舍车而徒，^④告穷此女。目色以臆，授之壶浆，全人自沉，形与口灭。卓绝千古，声凌浮云。激节必报之仇，雪诚无疑之地。难乎哉！

①《汉书》：太伯初奔荆蛮，荆蛮归之，号曰勾吴。颜师古注：“勾，音钩，夷俗语之发声也。亦犹越为‘於越’也。”

②《庄子》：“孔子穷于陈、蔡之间，七日不火食。”

③《史记》：伍胥奔吴，到昭关，昭关欲执之，伍胥独身步走，几不得脱。《索隐》云：昭关，其关在西江，乃吴、楚之境。《江南通志》：昭关，在和州含山县小岷西，伍子胥自楚奔吴过此。

④《周易·贲卦》：“贲其趾，舍车而徒。”

借如曹娥潜波，理贯于孝道；^①聂姊殒肆，概动于天伦。^②鲁姑弃子，以却三军之众；^③漂母进饭，没受千金之恩。^④方之于此，彼或易耳。

①《会稽典录》：孝女曹娥者，上虞人。父盱能抚节按歌，婆娑乐神。汉安二年，迎伍君神，泝涛而上，为水所掩，不得其尸。娥年十四，号慕思盱，乃投瓜于江，祝其父尸曰：“父在，此瓜当沉。”旬有七日，瓜偶沉，遂自投于江而死。县令度尚悲怜其意，为之改葬，命其弟子邯郸子礼为之作碑。

②《史记》：聂政刺杀侠累，因自皮面决眼，自屠出肠，遂以死。韩取聂政尸暴于市，购问莫知谁子。于是韩购悬之，有能言杀相侠累者，予千金。久之莫知也。政姐荣闻人有刺杀韩相者，贼不得，国不知其名姓，暴其尸而悬之千金，乃于邑曰：“其是吾弟

欤？”立起，如韩，之市，而死者果政也。伏尸哭极哀，曰：“是积深井里所谓暴政者也。”市行者诸众人皆曰：“此人暴虐吾国相，王悬购其姓名千金，夫人不闻欤？何敢来识之也？”荣应之曰：“闻之。然政以妾尚在之故，重自刑以绝从，妾其奈何畏没身之诛，终灭贤弟之名。”乃大呼天者三，卒於邑悲哀而死政之旁。晋、楚、齐、卫闻之，皆曰“非独政能也，乃其姊亦烈女也。”

- ③《列女传》：鲁义姑姐者，鲁野之妇人也。齐攻鲁至郊，望见一妇人，抱一儿携一儿而行。军且及之，弃其所抱，抱其所携而走山。儿随而啼，妇人遂行，不顾。齐将乃追之，问所抱者谁也，所弃者谁也。对曰：“所抱者妾兄之子也，所弃者妾之子也。见军之至，力不能两护，故弃妾之子。”齐将曰：“子之于母，其亲爱也，痛甚于心，今释之，而反抱兄之子，何也？”妇人曰：“己之子，私爱也。兄之子，公义也。夫背公义而向私爱，亡兄子而存妾子，幸而得全，则鲁君不吾畜，大夫不吾养，庶民国人不吾与也。夫如是，则胁肩无所容，而累足无所履也。子虽痛乎，独谓义何！故忍弃子而行义，不能无义而视鲁国。”于是齐将按兵而止，使人言于齐君曰：“鲁未可伐也。乃至于境，山泽之妇人耳，犹知持节行义，不以私害公，而况于朝臣士大夫乎？请还。”齐君许之。鲁君闻之，赐妇人束帛百端，号曰义姑姐。

- ④漂母事，见六卷注。

卒使伍君开张阖闾，^①倾荡鄢、郢。^②吴师鞭尸于楚国，申胥泣血于秦庭。^③我亡尔存，亦各壮志。张英风于古今，^④雪大愤于天地。微此女之力，^⑤虽云为之士，焉能咆哮烜赫，施于后世也。

①开张阖闾，谓开大吴君之霸业。

②鄢，楚之别都，唐时为襄州之宜城县。郢，楚之正都，唐时为荆州之江陵县。二地相去约二百五十里。



③《史记》：伍员与申包胥为交，员之亡也，谓包胥曰：“我必覆楚。”包胥曰：“我必存之。”及吴兵入郢，伍子胥求昭王不得，乃掘楚平王墓，出其尸，鞭之三百然后已。于是申包胥走秦告急，求救于秦，秦不许，包胥立于秦庭昼夜哭，七日七夜不绝其声。秦哀公怜之，曰：“楚虽无道，有臣若是，可无存乎？”乃遣车五百乘，救楚击吴。

④《北山移文》：“张英风于海甸。”

⑤《韵会》：“微，非也。”

望其溯所，怆然低回而不能去。每风号吴天，月苦荆水，^①响像如在，精魂可悲。惜其投金有泉，^②而刻石无主，哀哉！

①荆水，荆溪也。《溧阳县志》：溧水在县西北，一名濑水，上承丹阳湖，东流为宜兴县之荆溪，下注于太湖，旧名永阳江，又曰中江。

②《吴越春秋》：子胥既破楚，过溧阳濑水之上，乃长叹息曰：“吾尝饥于此，乞食于一女子，女子饲我，遂投水而亡。将欲报以百金，而不知其家。”乃投金水中而去。有顷，一老姬行哭而来，人问曰：“何哭之悲？”姬曰：“吾有女子，守志三十不嫁，往年击绵于此，遇一穷途君子，而辄饭之，恐事泄，自投于濑水。今闻伍君来，不得其偿，自伤虚死，是故悲耳。”人曰：“子胥欲报百金，不知其家，投金水中而去矣。”老姬遂取金而归。《一统志》：投金濑，在溧阳县西北四十里。

邑宰茱阳郑公名晏，^①家康成之学，^②世子产之才。^③琴清心闲，百里大化。有若主簿扶风窦嘉宾、县尉广平宋陟、丹阳李济、南郡陈然、清河张昭，^④皆有卿才霸略，^⑤同事相协，^⑥缅纪英淑，勒铭道周，^⑦虽陵

颍海竭，文或不死。

①按：唐时荥阳郡，即郑州，属河南道。扶风郡，即岐州，属关内道。广平郡，即洛州，属河北道。丹阳郡，即润州，属江南东道。南郡，即荆州，属山南东道。清河郡，即贝州，属河北道。皆诸人之族望，故冠于姓名之上，而实非产于其地者也。犹之太白生于蜀而自称陇西李白，退之生于南阳而自称昌黎韩愈耳。

②《后汉书》：郑玄，字康成，北海高密人。通《京氏易》、《公羊春秋》、《三统历》、《九章算术》、《周官》、《礼记》、《左氏春秋》、《韩诗》、《古文尚书》。

③《史记》：子产者，郑成公少子也，为人仁，爱人，事君忠厚。孔子尝过郑，与子产如兄弟云。及闻子产死，孔子为泣，曰：“古之遗爱也”

④唐时，上县置尉二人，而此之列名者四人，岂一时之制稍有增益与？

⑤《左传》：晋卿不如楚，其大夫则贤，皆卿才也。《华阳国志》：陈登曰：“雄姿杰出，有霸王之略，吾敬刘玄德。”骆宾王诗：“霸略今何在，王官尚岿然。”

⑥《书·洪范》：“相协厥居。”孔颖达《正义》：“相，助也。协，和也。”

⑦《广韵》：“颍，远也。”“勒，刻也”。《诗·国风》：“有杕之杜，生于道周。”《毛传》曰：“周，曲也。”

其辞曰：

粲粲贞女，^①孤生寒门。上无所天，^②下报母恩。春风三十，花落无言。乃如之人，激漂清源。碧流素手，萦彼潺湲。^③求思不可，^④秉节而存。伍胥东奔，乞食于此。女分壶浆，灭口而死。^⑤声动列国，义形壮士。人郢鞭尸，还吴雪耻。投金濂沚，报德称美。明明千秋，



如月在水。

①粲粲，美洁貌。

②上无所天，言无父无夫也。详六卷注。

③《广韵》：“潺湲，水流貌。”

④《诗·国风》：“汉有游女，不可求思。”

⑤《史记》：李园阴养死士，欲杀春申君以灭口。

天长节使鄂州刺史韦公 德政碑 并序

《唐书·地理志》，鄂州江夏郡隶江南西道。胡三省《通鉴注》：鄂州，春秋夏汭之地。《江夏记》云：一名夏口，一名鲁口。吴始筑郡城。晋末始立鄂州。隋平陈，改为鄂州，因鄂渚为名。

太虚既张，^①惟天之长。所以白帝真人，当高秋八月五日，降西方之金精，采天长为名，将传之无穷，纪圣诞之节也。^②

①孙绰《游天台山赋》：“太虚辽廓而无阂”。李善注：“太虚，天也。”

②《玉海》：《实录》：玄宗以垂拱元年八月五日生於东都。开元十七年八月癸亥，宴百僚於花萼楼下，左相乾曜、右相说上表曰：“少昊著流虹之感，商汤本玄鸟之命。陛下二气合神，九龙浴圣，月惟仲秋，日在端五，长星不见之夜，祥光照室之朝，请以为千秋节。著之甲令，布之天下，咸令宴乐。”群臣以是日献甘露醇



耐，上万岁寿酒。王公戚里进金镜绶带，士庶以结丝承露囊相遗问，村社作寿酒宴乐，名为赛白帝，报田神。天宝七载八月己亥，改为天长节。

我高祖创业，太宗成之，三后继统，^①王猷如一。^②大盗间起，^③开元中兴，力倍造化，功包天地。不然，何能遏牺、农之颓波，返淳朴于太古。虽轩后至道，由闻蚩尤之师；^④今网漏吞舟，^⑤而胡夷起于毂下。^⑥

①三后，谓高宗、中宗、睿宗。

②张协《七命》：“王猷四塞，函夏谧静。”李善注：“《毛诗》曰：‘王犹允塞。’犹，与猷同。”张铣注：“猷，道也。”

③大盗，指韦、武诸贼臣，以其谋危宗社，故曰大盗。

④《史记·五帝纪》：蚩尤作乱，不用帝命。于是黄帝乃征师诸侯，与蚩尤战于涿鹿之野，遂擒杀蚩尤。

⑤《酷吏传》：“漏网于吞舟之鱼。”

⑥司马相如《谏猎书》：“是胡、越起于毂下，而羌、夷接轸也。”李善《文选注》：“胡广《汉官解故注》曰：毂下，喻在辇毂之下，京城之中也。”

光天文武孝感皇帝，^①越在明两，总戎扶风。^②正帝车于北斗，^③拯横流于鲸口；^④回日辔于西山，^⑤拂蒙尘于帝颜。^⑥呼吸而收两京，烜赫而安六合。历列辟而罕匹，^⑦顾将来而无俦。太阳重轮，合耀并出。宇宙翕变，草木增荣。一麾而静妖氛，^⑧成功不处；五让而传剑玺，^⑨德冠乐推。

①《旧唐书》：至德三载正月戊寅，上皇御宣政殿，册皇帝尊号曰



- “光天文武大圣孝感皇帝”。上以徽号中有“大圣”二字，上表固让，不允。乾元二年春正月己巳朔，上御含元殿，受尊号曰“乾元大圣光天文武孝感皇帝”。
- ②越与奥通，发语声。明两，见二十二卷注。总戎扶风，见十一卷注。
- ③《甘氏星经》：北斗星谓之七政，天之诸侯，亦谓帝车。第一名天枢，第二名璇，第三名玗，第四名权，第五名衡，第六名闾阳，第七名瑶光。
- ④横流，见十一卷注。沈佺期诗：“魂魄游鬼门，骸骨遗鲸口。”
- ⑤庾信歌：“回日辔，动天关。”
- ⑥《左传》：“天子蒙尘于外，敢不奔问官守。”
- ⑦班固《典引》：“德臣列辟，功君百王。”章怀太子注：“列辟，谓古之帝王也。”
- ⑧任昉《宣德皇后令》：“白羽一麾，黄鸟底定。”李善注：“《鬻子》曰：武王率兵车以伐纣，纣虎旅百万，陈于商郊，起自黄鸟，至于赤斧，三军之士，靡不失色。武王乃命太公把白旆以麾之，纣军反走。”
- ⑨《汉书》：袁盎曰：“陛下至代邸，西向让天子者三，南向让天子者再。夫许由一让，陛下五以天下让，过许由四矣。”传剑玺，见十一卷注。肃宗克定两京，迎上皇还京，请归东宫，乃涕泣受传国玺，详见十一卷注。”

於戏！昔尧及舜、禹，皆无圣子，^①审历数去己，^②终大宝假人，^③饰让以成千载之美，未若以文明鸿业，^④授之元良，^⑤与天同休，相统亿祀。则我唐至公而无私，越三圣而殊轨。^⑥腾万人之喜气，烂八极之祥云。^⑦上皇思汾阳而高蹈，^⑧解负重于吾君。^⑨能事斯毕，与人更始。^⑩



①尧、舜无圣子，文乃兼禹言之，误也。

②《书·大禹谟》：“天之历数在汝躬。”蔡氏《集传》：“历数者，帝王相继之次第，犹岁时节气之先后。”

③《周易》：圣人之大宝曰“位”。

④鸿业，大业也。《后汉书》：“皇帝幼冲，承统鸿业。”

⑤《礼记》：“一有元良，万国以贞，世子之谓也。”

⑥《汉书·曹褒传》：“三五步骤，优劣殊轨。”

⑦《尚书大传》：“卿云烂兮，虹漫漫兮。”

⑧《庄子》：“尧治天下之民，平海内之政，往见四子藐姑射之山，汾水之阳，窅然丧其天下焉。”

⑨《淮南子》：“尧举天下而传之于舜，若解重负。然非直辞让，诚无以为也。”

10《汉书》：夫赦令者，将与天下更始。《后汉书》：荡涤宿恶，与人更始。

乃展祀郊庙，^①望秩山川。^②方掩骼于河、洛，^③吊人于幽、燕。但诛元凶，^④不问小罪。噫大块之气，^⑤歌炎汉之风。^⑥云滂洋，雨汪涉。^⑦澡渥泽，^⑧除瑕纇。削平国步，^⑨改号乾元。至矣哉！其雄图景命，^⑩有如此者。

①《韵会》：“展，诚也。”

②《书·舜典》：“望秩于山川。”孔氏《传》：“诸侯境内，名山大川，如其秩次望祭之，谓五岳牲礼视三公，四渎视诸侯，其余视伯子男。”蔡氏《集传》：“望而祭之，故曰望。秩者，其牲币祝号之次第。”

③《吕氏春秋》：“掩骼蠲醢。”高诱注：“白骨曰骼。”

④《宋书》：“志泉元凶，少雪仇耻。”

⑤《庄子》：“大块噫气，其名为风。”

⑥汉高祖《大风歌》，见二十卷注。

⑦司马相如《难蜀父老文》：“威武纷纭，湛恩汪涉。”颜师古注：



“汪涉，深广也。”

⑧王僧孺《谢除吏部郎启》：“自遇休明，多逢渥泽。”

⑨《诗·大雅》：“国步斯频。”《集传》曰：“步，犹运也。”

⑩江淹《恨赋》：“雄图既溢，武力未毕。”《诗·大雅》：“君子万年，景命有仆”。

我邦伯韦公，大彭之洪胤，^①扶阳之贵族。雄略迈古，^②高文变风。运当一贤，^③才堪三事。^④历职剖剧，能声旁流。振绣而白笔横冠，^⑤分符而彤襜入境。^⑥曩者永王以天人授钺，东巡无名。^⑦利剑承喉以胁从，壮心坚守而不动。房陵之俗，^⑧安于太山；^⑨休奕列郡，去若始至。帝召岐下，^⑩深嘉直诚。

①邦伯，谓刺史。见六卷注。《唐书》：韦氏出自风姓，颛顼孙大彭为夏诸侯，少康之世封其别孙元哲于豕韦，其地滑州韦城是也。豕台、大彭迭为商伯，周赧王时始失国，徙居彭城，以国为氏。韦伯遐二十四世孙孟为汉楚王傅，去位徙居鲁国邹县。孟四世孙贤，汉丞相，扶阳节侯，又徙京兆杜陵。《晋书·乐志》：“载德奕世，垂庆洪胤。”

②《后汉书》：荀彧闻曹操有雄略。

③甄鸾《笑道论》：《文始传》云：“五百年一贤，千年一圣。”

④三事，三公也。见十九卷注。

⑤绣衣、白笔，御史事，见十一卷注。

⑥分符、彤襜，刺史事。分符，谓郡守得分虎符、竹使符，详五卷注。彤襜，见十四卷注。

⑦天人，见五卷注。薛道衡《高祖文皇帝颂》：“授钺天人，豁然清荡。”永王东巡事，详后三十卷注。《艺文类聚》：挚虞《新礼仪》曰：汉、魏故事，遣将出征，符节郎授钺于朝堂。新礼，遣将御临轩，尚书授节钺，古兵书跪而推毂之义也。《唐六典》：凡大将

出征，皆告庙授斧钺。

⑧《唐书·地理志》，山南东道有房州房陵郡。

⑨《汉书》：易于反掌，安于泰山。

⑩岐下，岐山之下，唐时为岐州扶风郡，肃宗时改称凤翔郡，未复京师以前，驻蹕其地者凡八月。

移镇夏口，^①救时艰也。慎厥职，康乃人。减兵归农，除害息暴。大水灭郭，洪霖注川。^②人见忧于鱼鳖，^③岸不辨于牛马。^④公乃抗辞正色，言于城隍曰：^⑤“若三日雨不歇，吾当伐乔木，^⑥焚清祠。”精心感动，其应如响。无何，中使衔命，遍祈名山，^⑦广征牲牢，骤欲致祭。公又盱衡而称曰：^⑧“今主上明圣，怀于百灵，^⑨此淫昏之鬼，^⑩不载祀典，若烦国礼，是荒巫风。”^⑪其秉心达识，皆此类也。物不知化，如登春台。^⑫

①杜氏《通典》：鄂州，吴时常为重镇，历代亦为兵冲。其地亦曰夏口，亦曰鲁口。

②曹毗《霖雨诗》：“洪霖弥旬日，翳翳四区昏。”

③刘勰《新论》：禹为匹夫，未有功名，尧深知之，使治水焉。使百川东注于海，西被于流沙，生人免为鱼鳖之患。

④《庄子》：“秋水时至，百川灌河，泾流之大，两涘渚涯之间，不辨牛马。”

⑤按“城隍之祀，莫详所自。芜湖城隍，相传建于吴赤乌二年，则其来久矣。《南史》：梁邵陵王纶祭城隍神。《北史》：慕容俨镇郢城，城中先有神祠一所，号城隍神。唐李阳冰《缙云县城隍神记》：城隍神，祀典无之，惟吴越有尔。风俗，水旱疾疫必祷焉。《太平广记》：吴俗畏鬼，每州县必有城隍神。陆游云：唐以来郡县皆祭城隍，今世尤谨，守令谒见，仪在他神祠上，社稷虽尊，



特以令式从事，至祈禳报赛，独城隍而已。

⑥《诗·国风》：“南有乔木。”《毛传》曰：“乔，上竦也。”

⑦《唐书》：肃宗尝不豫，太卜建言，崇在山川。王屿遣女巫乘传，分祷天下名山大川，巫皆盛服，中人护领。此文所云“中使衔命，遍祈名山”，即其事也。

⑧《汉书》：“盱衡厉色。”孟康注：“眉上曰衡。盱衡，举目扬眉也。”左思《魏都赋》：“有睟其容，乃盱衡而诰。”刘渊林注：“盱衡，举眉大视也。”

⑨班固《东都赋》：“礼神祇，怀百灵。”

⑩《左传》：“又用诸淫昏之鬼。”

⑪《书·伊训》：“敢有恒舞于宫，酣歌于室，时谓巫风。”

⑫《老子》：“众人熙熙，如享太牢，如登春台”。河上公注：春，阴阳交通，万物咸动，登台观之，意志淫淫然也。”

有若江夏县令薛公，^①揖四豪之风，^②当百里之寄。干蛊有立，^③含章可贞。^④遵之典礼，恤疲于和乐，政其成也，臻于小康。^⑤

①江夏县，鄂州附郭之县。

②四豪，见十二卷注。

③《易·蛊卦》：“初六，干父之蛊。”

④《坤卦》：“六三，含章可贞。”孔颖达《正义》云：“六三，处下卦之极，既居阴极，能自降退，不为事始。惟内含章美之道，待命乃行，可以得正。故曰‘含章可贞。’”

⑤《诗·大雅》：“迄可小康。”

中京重睹于汉仪，^①列郡还闻于舜乐。选鄂之胜，^②帐于东门。乃登幽歌，击土鼓，^③祀蓐收，^④迎田祖。^⑤招摇回而大火乃落，^⑥阊阖启而凉风始归。^⑦笙竽和箫之